

張文襄公電奏

張文襄公全集卷七十九

電奏七

致總署

光緒二十一年九月十二日已刻發

金陵至鎮江蘇杭上海鐵路有益商務籌餉海防三端
洞已兩次電奏接蘇撫函蘇紳籌商務節略擬辦由蘇
至滬鐵路現擬先委洋弁勘路繪圖俟估工籌款後再
請旨辦理大約先自吳淞口達上海自滬達蘇達鎮達
甯分枝達杭節節相機辦理辦一節卽有一節之利不
比他處請代奏文

致總署

光緒二十一年九月十九日亥刻發

恭讀十六日電旨感悚莫名鐵廠槍礮廠現辦情形并
籌計經費洞於八月二十八日謹分三摺兩片具奏計
已上達洞才庸智淺惟有矢此愚誠尙堪自信敬當懍
遵聖諭事事求實不敢妄費不容欺蒙竊思此兩廠事
多相連招商總不甚便似仍以籌款官辦爲宜請代奏
效

總署來電

光緒二十一年九月十六日亥刻到

奉旨近聞湖北鐵廠採煤合用大爐業已燒通每年
可出快槍七八千枝鐵軌尤易鑄造張之洞經理此
事歷有年所著將現辦情形切實覆奏如經費不足

亦應確切直陳現在時事多艱中外大臣宜講求一
實字總之母妄費毋受欺蒙方有實濟該督其深體
此意欽此鈐

致總署

光緒二十一年十月十二日辰刻發

真電奉旨恭悉前奉旨調輪填紮旅順廟謨深遠已飭
速備南洋五兵輪一艘攔淺餘均應修方能出海焦急
萬狀旬日疊催設法頃據滬局電復四輪分入華洋各
局廠修約月內趕修竣前旨三月退還計期尙來得及
查閩有兵輪二擬商調併紮旅順如月內未能全修畢
擬隨竣隨派往如月內彼即退旅順只可先派閩輪往

我有輪占鵲他國卽不能生心并陳明本日滬局始覆到故前未敢冒昧具奏請代奏文

總署來電

光緒二十一年九月二十二日酉刻到

奉旨歸遼議定三月退兵旅順地方雖經殘破而形勢扼要頗有他國覬覦著張之洞將南洋所有各船收集查驗一俟彼兵將退調派數艦卽日北駛將船鵲填紮該督其熟籌利害毋稍拘泥並卽電復欽此

養

又

光緒二十一年十月十一日酉刻到

奉旨前諭張之洞令將南洋各輪預備移泊旅順至

今未覆茲牛莊營口於十四日歸還旅順交期亦即
不違若虛而弗守恐啟眈視之端況膠澳已准俄船
過冬尤慮各國援爲口實著張之洞速飭帶輪員弁
整頓北駛先到煙臺候信再進旅陽毋得耽延并卽
電奏欽此真

致總署

光緒二十一年十月十五日申刻發

元電奉旨恭悉遵已調閩輪并趕修江省輪陸續派往
不致有誤閩復電福靖一輪先來其建靖前經北洋訂
妥赴津現未竣工至南洋各輪往來滬鄂載勇運械行
駛不停南琛載勇在皖擱淺沙深水涸百計拖救尙未

出淺現仍設法凡修輪可緩則緩以節經費數輪在長江仍可行用因北洋冬令風浪太大故須修艙看底方能出海滬局陽修費較省洋廠費多故陸續入陽爲節費計今已分廠趕修從前並非廢置海灘謹據實陳明洞連日在江上看魚雷艇及礮臺車礮軍事所需尤極經心今輪少用繁極力珍護斷不敢令其閒曠請代奏咸

總署來電

光緒二十一年十月十三日戊刻到

奉旨張之洞電悉南洋五輪一擱淺而四待修設無移泊之旨豈竟任其廢置海灘耶該督留心軍事何

以疏忽如此現在旅順未交著將四輪勒限趕修并飭將弁整備一切閩輪二艘著准其先行調往欽此元

致總署

光緒二十一年十月十六日亥刻發

本月十一日俄將沃嘎克見問來華何事沃云奉國命駐滬探中國及東洋有關練兵用兵事隨時稟報問來金陵何意沃云該公使命來見因鐵路事答云鐵路總署主持奏明請旨定奪若我等閒談則可但所說乃洞一人意見非朝廷旨沃云中國究修鐵路否答云事勢必修沃云蘆漢路願與俄國鐵路接通否答云願接沃

云籌款借修乎抑令英美等國代修乎答云此款鉅若
籌不足擬借款然總是我自修用洋匠督工則可斷不
能令他國代修沃云甚是俄國鐵路願與中國接不願
與他國接並問洞意擬在何處接答云有兩路一由天
津張家口恰克圖出境與俄接一由山海關外奉天吉
林黑龍江與俄接克圖一路平坦兼顧西路沃云我意
宜在黑龍江接恰圖一路少水少煤不便黑龍江雖有
山山脉係南北形緣山可修且有煤有柴有水問何以
知有煤答云以山勢論之無煤柴亦可用若修恰圖一
路則俄國西畢利之路東一大段太冷落無利矣答云

俄不願華路近西分俄路之利我早知之但修東路於
我東三省亦有益洞又問俄路在何處出海沃云擬在
大連灣其地終年不凍勝琿春及天津答云大連灣誠
好兩國均有大益從此歐洲細貨皆走鐵路速而且穩
東海他國輪船之利大半爲俄路所奪中國亦有利言
至此沃詞色欣快已極洞因問中國路款難籌俄能代
借否沃云當可凡於華有益之事於俄即有益故俄助
華卽是自助問息若干沃云未問本國不敢言然近日
俄代華借款非五釐乎答云煩轉致貴公使姑一詢代
借款事沃云可一詢臨行復切告以土語皆係閒談次

日即回滬察沃將所見言皆緊要關鍵若關外鐵路擴至大連灣我據此不凍之海口坐收俄國二萬里鐵路之利且俄之援兵易到旅順永遠無患其利宏大但大連灣海口萬不可讓與俄國雖有德於我此處萬不能假借謹撮要密陳以便朝廷籌計事機萬緊情形曲摺擬難刪簡併陳明請代奏諫

總署來電

光緒二十一年十月十八日戌刻到

奉旨張之洞電悉俄路現修至托穆司克本欲橫通海參崴今派員假道勘路則意在大連灣矣與其彼來莫如我接前諭三省將軍一面伴送俄員一面隨

地查勘正是此意惟集股甚難借款亦不易該督所
陳豈能遽辦至俄款利息并非五釐該督亦無庸輕
與商借也欽此巧

致總署

光緒二十一年十月二十二日亥刻發

奉旨裁撤他省調來勇營自應欽遵現已裁十四營一
哨以後仍當斟酌續裁因月來北路遣勇及閩厦散勇
絡繹深恐湘鄂壅滯生事不敢不詳慎相機妥辦請代
奏養

總署來電

光緒二十一年九月二十七日申刻到

奉旨自昨歲用兵而勇營之積弊畢露北土諸軍除

遺撤外回防之營亦應嚴查空額大加歸併其由他
省調至江南者著張之洞速卽裁撤毋任虛糜欽此
咸

致總署

光緒二十一年十一月初六日辰刻發

歌電奉旨恭悉南洋宸泰開濟兩輪已修竣料理器具
薪糧挑選水勇準於初九日北駛閩福靖一輪初六日
自閩北駛餘鏡清南瑞兩輪亦隨後陸續北駛至蘇滬
鐵路一節久已分派洋工師偕委員兩頭勘繪一自江
甯至鎮江而達蘇州一自吳淞至上海而達蘇州再接
杭州甯鎮一段洋員已勘畢民情欣悅蘇滬一段勘路

洋員不日即抵蘇查蘇滬一段利益最速已定議興辦
事在必成華商踴躍願辦已飭議詳章及官路商路交
接章程現擬吳淞至上海縣三十里官辦上海至蘇州
二百餘里商辦但商辦仍須官爲督理其蘇州至江甯
一段另行籌議請代奏語

總署來電

光緒二十一年十一月初五日戌刻到

奉旨前據張之洞奏南洋各船計十月底修齊現在
金旅已復船塢尙虛南船何日北駛著電復又由滬
達蘇鐵路有成議否并電聞欽此歌

致總署督辦軍務處天津王制台

光緒二十一年十一月二十六

日丑
刻發

江南鏡清南瑞閩省福靖共三輪於二十四日到旅順
連前於十六日到旅之開濟寔泰前後五輪俱到齊請
代奏宥

致總署 光緒二十二年二月二十四日亥刻發

沿江各省錢價奇貴鄂省茶市在即需錢既多錢價尤
貴商民大困市面惶擾除嚴辦私銷禁止出口兼趕鑄
銀元外亟須多鑄銅錢方足以濟民用而平市價現已
購辦銅鉛寄粵用機器鑄錢運鄂行用查粵局奏案銅
錢每文重八分目下銅鉛價貴錢重則私銷必多旋鑄

旋毀無裨大局詳加核計因時制宜莫若每文改重六分既可杜絕私銷兼免多虧鑄本經洞電商粵省錢局試鑄只須圓徑減少半分厚薄仍舊輪廓字體均甚明顯可否每文改重六分事關奏案急切待鑄懇代奏請旨遵行之洞繼洵同肅敬

致總署

光緒二十三年正月二十日已刻發

湖北上年水災甚廣隄潰太多工賑並籌需費甚鉅曾經奏蒙聖恩准撥地丁等款共銀八萬並蒙俞允展賑捐以充工賑小民無不感頌鴻慈惟隄工太鉅已勉力湊發錢三十餘萬串不敷尙多而宜昌施南鄖陽三

府又迭據稟報上年秋霖爲患所種維糧皆爛民食雜
艱亦經撥銀數萬賑濟無如該三府皆係山鄉僻遠運
販難到現在餘糧已盡饑寒交迫灾象愈顯窮民多食
草根樹皮觀音土慘不忍覩以致餓殍枕藉疊飭司道
及地方官多方籌款拯救奈灾廣款微無濟於事奉撥
之地丁現無存款可撥鹽釐兩項京協本省軍餉及洋
款所需不能不顧賑捐久成弩末驟難集成鉅款洞涸
等與司道地方官焦灼萬狀悚疚莫名既須辦安陸荆
州荆門漢陽等處水鄉之工又須籌宜施鄖三府山鄉
之賑需款浩繁羅掘已盡竊思各省曾因灾賑奏准截

留漕糧有案湖北去冬採辦漕糧三萬石計米價運費
例發銀七萬餘兩雖經採辦尙未起運仰懇天恩俯准
截留此項漕米及運費以充工賑之需當責令委員勸
諭米商變價照數繳回原款一面委員迅速分赴廣東
四川江南等處分勸賑捐以資補苴而活災黎不勝激
切惶悚待命之至請代奏之洞繼洵同肅號

致總署

光緒二十三年三月十八日寅刻發

頃奉條電以洋債國家作保慮及代還利害屬會籌電
復遵轉電滬磋商總期無弊商妥卽速復恐 上垂詢
請代奏嘯

總署來電

光緒二十二年三月十七日到

北洋轉盛京卿電與英人恭佩珥議路債草約第三條內載國家作保等語儻屆期公司力難措還勢必要國家代償似無代償之理此中利害不可不預爲籌及應如何慎防流弊請貴督就近會商盛京卿妥晰電復篠

致總署

光緒二十三年三月二十五日午刻發

比銀行已到鄂會議兩次亦欲國家作保並須先用中國自有之款再用該國借款暗合造成一段抵押一段之意大約鐵路借款非比關票彼執可以抵完關稅也

故無論議借何國之款皆須如此會摺所請照原議先發部款千萬趕緊開造庶可有路抵借而商股亦可漸致以免虛曠歲月係屬實情洋人勘路由漢至蘆大概已定乞代奏文部之洞宜懷謹肅有

致總署

光緒二十三年三月二十九日辰刻發

有電謹悉蘆漢以拱衛爲本商務其末也惟因官款難全籌官事難核寔乃立公司又因商股宜漸集商力宜扶持乃准公司借洋債蓋此路重在備緩急不僅在課盈虛卽以盈虛論如此長路收費必盈竊料竣工後每年必有商股陸續可收復有路利盈餘可提寔有把握

但洋債合同既欲列國家作保字樣則鐵路不能不設一國家收回之說未必確有其事也況五年後路本值四千餘萬俟約還洋債一半則以四千餘萬之路僅抵銀一千數百萬矣不妨再借第二款所謂借債還債公司亦已預籌及此公司有人豈甘暴棄國家慮及收回無益亦譬如官款官造而已況路在商手祇有路費可償路在官手更有路稅路釐可償債款有著便無難事事關久遠不憚審思謹再據實詳陳伏祈垂察代奏文韶之洞宣懷同肅艷

總署來電

光緒二十三年三月二十五日到

箇電悉借款既須國家作保盈虛自當審慎來電所擬攤還出款係有定之數而路利所入尙虛懸之款每年以入抵出有無實在把握至謂公司果不能還路歸國家收回云云公司既無利可圖收回亦屬無益務希再行會同詳細體察電復有

致總署

光緒二十三年四月初三日午刻發

二十九日欽奉電旨鐵路既設公司借款應歸公司擔保何以洋人復索國家作保況此路未成及甫成而未獲利時此項洋息從何取給豈亦由國家代還耶著再分晰電奏等因欽此查前五年路未成時每年止還利

二十萬鎊卽在成本內開支所招之商股所借之洋債皆成本也後五年路甫成時並不還本仍止還利二十萬鎊其時商股必已雲集應還洋息卽在商股及路利內開支路利雖不甚豐必敷洋息一半十餘萬鎊之數此確有把握者也此路全工約計本不須借洋款四百萬鎊之數所以多借數十萬鎊者正爲此十年內未成甫成之際商股路利設或不敷洋息以此數十萬鎊備湊還之用照此計算可資取給公司旣無失信之虞國家自更無代還之事蓋公司係屬認還之人不僅擔保國家但有作保之說決非代還惟洋人以三十年爲日

方長公司之予奪督辦之委任鐵路之利益操縱均在國家此各國議借路款仍須國家保其本息有著之故也近日比國銀行所擬合同原稿國家作保之下尙有公司如不能還應將鐵路由國家收回代還本利字樣因此語不妥特爲力辯將其刪去止云作保可見代還與作保迴不相同現與比行熟商令其併將作保二字刪去比行決意不肯該銀行直言比係小國旣無圖占中國鐵路之心又無兵力故不能不仰望國家作保前與各洋商議借雖章程各異作保亦同現已屬比領事請其公使姑且電商彼國意甚爲難允以三日回信大

抵僅給借款之額利則必保若併與承辦管路之全權則不必保權衡輕重似宜循借款抵保之原議未可貽事權屬人之鉅累竊謂蘆漢一路乃中國全路之大綱將來南抵粵海北接吉林中權扼要在此生發根基亦在此氣勢暢通全局自振運載之利猶其末也且俄人造路程工甚急勢必五年之後卽催我與之相接否則要求代造我雖欲不接造而不能故蘆漢幹路論近效則聯中國各省之氣脈論遠效則通歐洲各國之轉運但患路工之不速不患路利之不豐若蘆漢借款有所阻礙則官款商股一時力絀無以爲騰挪周轉之資生

發擴充之地其關係事機之得失誠非細故臣等肩茲重任所難惟在謀始時局艱危急須挽救事機易誤歲月如馳若五年之內自強大計尙未立定規模則五年以後中外如何情形實難逆料深慮鉅工未能早成不勝憂懼謹遵旨會議分晰覆陳仰懇朝廷俯念路工關係時局保借毫無流弊恩准維持大局幸甚請代奏文韶之洞宣懷同肅江

致總署

光緒二十三年四月初六日亥刻發

豪電復奏後又與比行切商總公司係奉旨承辦但經國家核准其權利必能歸還借款頃比行面稱彼國復

電果能如此卽不寫國家作保亦可比使自京復電意
亦轉圜惟該行必欲知公司之權利確能措還借款之
實際卽允此合同只須國家批准刪去擔保字樣當卽
告以已請朝廷准總公司承辦四五十年並請推廣蘇
杭粵漢瀋吉南北鐵路日久則自有輾轉孳生之利任
專則自有周轉酌劑之權足可放心該行聞此意已釋
然當卽定議已立草約一二日內卽可畫押謹此會同
電奏以慰宸厪請代奏文韶之洞宣懷同肅語

致總署

光緒二十三年四月初九日午刻發

初八奉電旨借款草合同底著卽電來且勿畫押等因

謹查草合同本係載明會同具摺奏陳候旨批准由總
署將批准日期照會比使於兩箇月內再行畫押立爲
正合同等語並與訂明正合同必候具摺批准如不准
仍作廢因各國猜忌新聞紙屢言借款難成或致變卦
故擬先立草合同也至條款毫無牽涉權利及推廣辦
法惟該行慮本利須三十年還清若須展限則更久欲
將總公司承辦年限憑據粘入合同告以無此體制止
許其俟奏准後鈔給閱看蓋西例承辦之人可隨時更
換而承辦之公司必有年限也彼又慮蘆漢無甚利益
則還款亦無把握與朝廷所慮之意相同故告以公司

可請推廣生發此僅面告以放其心並未列入合同茲
遵將草合同全錄電陳此合同如能照辦不變較之美
國包辦分紅股之議權利尙不致失至利息原議五釐
不扣現照美國與議四釐九扣另給買料五釐酬勞尙
須俟本利數目清單算准再定應否定議伏乞聖裁請
代奏文韶之洞宣懷謹肅合同底遵已逕電總署另飭
津局鈔呈佳

致總署天津王制台

光緒二十三年十一月三十
日未刻發

二十六日電旨恭悉膠事危迫焦憤萬分遵旨擬五條
一請電旨速派許景澄爲頭等欽差酌加一銜以重之

令自謁德主情惻易通德主真意易測商辦較爲活便
惟國書一時難寄到恐彼不認擬請辦就國書送海使
一閱囑其電告外部一面由總署徑電德外部囑其速
認速見許爲人精密穩慎雖頭等斷不敢專擅可否請
由朝廷發國電徑達德主尤得力一此事以教案爲根
聞德人言山東教士歷年憤鬱此案初出教士徑電德
主言係官兵所殺必有官主使故德主甚怒立電兵船
據膠嗣接教士續電言係散勇德廷立電水師提督離
開膠州十月二十八日電到滬故水師旋出膠城此時
許使宜先將教案立論言教案已極力速辦可優於所

索卽在濟甯發巨款十萬由官代修一新教堂敕賜匾額仿宣武門教堂故事并酌賞古玩器物一面降明旨通諭禁薄待教士并詳述教係勸善德雖是藉口占地然教士之憤稍平則助勢激眾者較少一德有歸遼之功必應酬謝德無屯兵之島必予一地惟膠灣必宜設法商令退還恐各國效尤俄占旅順倭占威海英占吳淞法占瓊州海口全失海軍無溴永無自強之望不可爲國矣只可以福建他島與之以爲酬謝雖或加他項利益亦可至膠改作商埠多給租界能如署議最妥一六條中惟山東鐵路一條最毒惡意在吞吸全齊硬駁

彼必不允或以江甯至滬鐵路與之相抵海使會遣德員來鄂商盛京卿及洞欲攬辦甯滬鐵路借款利息五釐一毫半本息俱攤在內六十年還清不再還本盛京卿細核並不喫虧較招商股息尙輕如肯以此路相抵較勝且路從滬起各國牽掣爲患較輕一各國乘機效尤紛紛占地各國皆同俄亦自爲並無軒輊惟俄艦已集旅順無術麾之使去聞俄禁兵登岸囑勿驚疑且告我極力相助是俄尙有分寸尙有外面較之英來文明言索地者稍勝只可因而用之密速切懇相助但議定事成後太連灣萬勿久占以免他國藉口我當別予酬

謝總之三年以來各國蓄謀分占橫暴無理實無善策
惟有熟權利害之輕重遠近緩急但使其害歲月稍緩
距京師津滬稍遠尙容我於數年間趕緊振作補救尙
可免力支持徐觀各國之變若各海口盡爲各國分踞
扼我咽喉斷我南北海道四面困逼富强無資中國直
如印度矣至此事許使與議總以能將了結教案與讓
地屯兵劃分爲兩事最爲竅要讓地是酬謝他不歸教
案如此則以後教案方有辦法否則一教案卽占地中
國斷無策以善其後也海使延宕專待彼大隊兵船船
到立逼定議彼時各國勸不及勸援不及援謀不及謀

險毒已極故此時尤以迅速設法爲至要事機萬緊痛憤憂灼勉陳管見以備朝廷采擇請代奏卅

致總署

光緒二十三年十二月初五日午刻發

連接上海道及在滬各委員函稱并各種洋報均云英深忌俄如中國予俄以權英必力保長江商務至保江一節或云踞吳淞口或云英擬在吳淞自建礮臺或云踞舟山及吳淞口外各島或云入江直至重慶一帶說雖異意則同據上海蔡道電稱英領事告該道請准其兵船人等每日往游礮臺已婉却之等語是各種傳說却非無因路透電報云聞中國借俄款修旅順礮臺俄

人監工俄向中國索諸軍須改用俄人爲教習鐵路英
工司均須辭去等語憤忌情形迫切已極現在德事既
將膠灣劃開另議是所患又不在德而在俄總之俄於
此時若不明占旅灣英卽無從藉口德不硬踞膠灣俄
亦無從藉口在我無論如何將他事遷就受虧總須令
俄不擅北洋之權若俄有明利英必不甘大局無從維
持矣俄德係通謀英俄係仇敵而其爲效尤圖我則一
倭將事另電詳陳請代奏微

致總署

光緒二十三年十二月初十日辰刻發

傳聞教案已結復翻英艦亦赴旅順與俄爭泊法六艦

集滬欲藉四明公所舊案生衅種種危險萬分竊揆今日情事必須將英國安頓妥帖善爲羈縻不然必有急禍英人擅東方海面商利此時深忌俄德法而聯倭英東方兵船最多彼一面逞忿於俄一面將肆毒於我英水師將向自強軍總辦沈道言欲入長江自吳淞至重慶以護商勢恐不免川楚或未必吳淞鎮江危矣前奉宥電諭旨若僅聯一二國適啟爭局誠爲至當不易之論此時旣不能拒德又不能逐俄顯有偏重似以兼聯英倭爲要策德使詭計乃藉端生波待其大隊兵船彼時各國同時下手我若聯英尙可與商和緩辦法我不

聯英彼自用兵力強古矣英船入江將沿江礮臺占踞於口岸處所陸兵登岸屯劄腹心已潰且各省商民驚擾匪徒乘機徧燒教堂大局不可爲矣今日急著約有四端首在迅速兼聯英倭英旣聯則倭附之至聯英之法英將有中國出費予英艦保護之語又云英政府意伊未能知須中國派專使與英商等語似可切詢總稅司赫德英國意擬如何聯法即可與英公使密商告以專使前往太遲恐來不及卽電駐英羅使令速商外部仍懇發國電徑致英主切商一也德事仍望電派許使爲頭等欽差見德主面陳并致國電德主好兵而性暴

冀稍緩其燄二也俄既不能阻德占膠又不勸了教案
且貽英國口實幫助何在宜切實懇之許以他項利益
萬勿占旅三也倭情甚急自欲防害必無奢望落得聯
之另電詳陳四也大率俄德法爲一黨英倭爲一黨彼
分黨合謀效尤圖我并無軒輊前卅電已詳陳然羈縻
英倭則俄德法稍有所忌結交俄國則英所求亦不能
甚奢而尤在先息德主之暴各國互相觀望牽制或可
稍戢凶鋒正與前旨不專聯一二國之意相符南洋劉
來電亦深願聯英倭事機萬緊遲至臘底恐決裂難補
救矣迫切上陳請代奏蒸一

致總署

光緒二十三年十二月初十日巳刻發

倭參謀部副將神尾光臣到鄂洞出省未回江漢關道及洋務委員見之伊深談傾吐大略言前年之戰彼此俱誤今日西洋白人日熾中東日危中東係同種同文同教之國深願與中國聯絡此係其國陸軍二等提督川上操六之意命之前來囑轉告洞等語近日其參謀部員宇都宮太郎又來鄂見洞致其提督川上操六之命送日本地圖及政治書各一部語極殷勤意在兩國聯絡并言今日武備最要囑派人到彼入武備及各種學堂地近費省該國必優待切教等語復密向委員談

倭已與英聯盟倭願助中助有三法一用兵船倭船足
能敵俄德現派來之船但恐續到船多一用口說勸解
但恐不聽一聯英以助中惟第三法尙易行等語洞因
其官階較小令電致神尾光臣令速再來鄂來時問明
川上操六及其管陸軍小松王主意伊已發電矣大抵
倭見俄日強德日橫法將踵起英亦效尤海口盡占中
國固危倭四面皆受強鄰之逼彼亦危矣故今日急欲
聯英聯中以抗俄德而圖自保彼既願助我落得用之
蓋倭不能抗俄德英水師則能之聯倭者所以爲聯英
之樞紐也倭肯出力勸英與我聯則英不能非理要求

而我可藉英之援助矣我不與倭聯則彼將附英以窺長江矣倭人此舉利害甚明於我似甚有益俟神尾來晤後卽詳陳請代奏蒸亥

致總署

光緒二十三年十二月初十日亥刻發

日本參謀宇都宮今晚又密告伊此來實係奉其內旨而來密商聯交之事語尤切實且勸我聯英力諫聯英之利不聯英之害頗有辦法察其語氣似英人陰謀倭已全知今晨蒸兩電奏想已上達伏懇諭示此事大指以便斟酌相機酬對請代奏蒸亥

致總署

光緒二十三年十二月二十二日申刻發

聞德國租佔膠澳并允承辦山東鐵路英法皆甚豔羨
香港洋報載英國所當急行者建造鐵路之利理應幹
營中國中路或廣東建築軌道方不致落他人之後等
語近有日本人來鄂密稱英國欲借款修路并欲香港
對岸深水埗地方證之西報英覬覦鐵路從粵東下手
以達漢口蓄謀必確今春英商屢求承造粵路堅持未
允現在德與俄法均得路權英若遽向總署要素勢難
空言拒絕現據湘粵鄂三省紳商公呈總公司籲請會
奏立案由三省紳商自行承辦仍歸總公司綜其綱領
除批准一面卽日具摺會奏外如果目前各國有以粵

漢鐵路爲請者應卽告以三省紳民先已遞呈議定合
立公司准歸自辦藉杜其口現在沿海沿邊無以自保
要在保我腹心徐圖補救若使英人佔造粵漢軌道既
扼我沿海咽喉復貫我內地腹心以後雖有智勇無所
復施中國不能自立矣事機萬分危迫用敢先行據實
電陳伏祈飭總署預爲防範此事關係大局安危不僅
鐵路一端也請代奏文韶之洞宣懷謹肅養

樹柑按十
二月二十

二日致王制台電云英覬粵漢鐵路其亟大局將危楚
粵士民均甚惶恐急因與陳右帥電商博采士民公
議現經湘粵鄂三省紳商公呈總公司請會奏立案除
敘一摺兩片會列台銜迅速繕發摘要另電外尙恐摺
遲先擬電奏以備抵制務
懇迅賜酌定轉發云云

致總署

光緒二十三年十二月二十四日未刻發

各洋報屢言英國國家欲借款與中國利息甚輕已赴
京商議等語聞之不勝詫異憂慮英廷此時因德事不
甘正欲效尤要挾何以反肯以輕息借我若議借款必
索釐金鹽課抵押且必干我利權如令赫德兼管釐金
等事爲害甚烈查目前借款想卽係明年五月應付日
本一萬萬之款竊思此款似可別籌辦法查日本和約
餘款一萬萬平分六次交納未經交完之款按年加每
百抽五之息但不論何時或將賠款全數或將幾分先
期交付均聽中國之便等語是此款若緩還年息不過

五釐且遲早多少均聽我便此時海疆紛紜大局未定無論何國借債皆必居奇要挾息重扣多強索抵押必致種種貽害何不即將日本此款暫緩交付按年認息息止五釐無扣較之九扣八扣有零者所省甚多一也不須別籌抵押不致因此牽動鹽釐等款二也五年之內隨時可還大局既定之後相機商借不受抑勒三也原議所以急欲付清者欲令早撤威海之兵也然今昔情形大有不同德已踞膠俄又駐旅何在威海日本一軍耶且俄德南北夾駐日軍間隔其中俄德惡倭倭忌俄德三國正可彼此牽制四也洞前請聯英者欲豫防

而羈縻之免其硬占橫行非以英爲可恃也伏望從長
計議勿受彼乘危之挾大局幸甚管見謹備采擇請代
奏敬一

致總署

光緒二十三年十二月二十四日酉刻發

英人消息甚緊不日必有大舉憂憤萬分此時必須早
籌應付之法以備臨時抵制參考各洋報及日本人之
言大率一借款一索香港對岸之深水埠及舟山一造
粵漢鐵路一入長江至鎮江金陵屯兵共四事保商務
者飾詞也粵漢鐵路萬不可許現據楚粵三省紳民公
呈請合立公司自造已會同電奏在案四事皆甚險毒

總署如能一概力拒至爲深幸儻彼非得不休竊擬有
抵制三條爲患稍輕而在我亦尙有益一借款練海軍
中國無海不能立國無海軍卽無海矣中國無長江各
省立時擾亂英兵屯金陵鎮江中國卽無江矣水師惟
英最精英若借巨款造戰艦雷艇數十艘船向英造將
向英借并派將弁學生數百人赴英學習船造成我將
弁亦練成矣募英將如琅威理者統之管帶用中國人
船上執事參用英人卽與英船在東方者合隊操練英
旣得造船之利又得多用英人之益又得我海軍爲伊
東方兵船助勢各國洋報皆因中國無自強之實故啟

瓜分之議今見我大舉經營海軍氣象頓爲一振自可
息其狡謀則海面海口可保商務自無礙彼卽不能藉
護商之名以入江是中國且藉此舉而自強矣此與借
款賠日本不同彼必樂從不至勒索抵押或以西南邊
遠地鑛山作押目前船未造成可照英將所言出養船
費借英船數艘扼吳淞口外以護商務亦可杜彼藉口
入江護商之舉一也一准英借款修山西陝西鐵路卽
以此路作抵山西路由正定井陘至太原陝西路由黃
河南岸榮澤洛陽沿河入潼關至西安并准英與華人
合開山西煤鐵鑛餘利與我均分洋報屢言英若不在

中國得鐵路一條心必不甘山陝之路與我蘆漢幹路接不通海口尙無大患彼圖鑛利當易商允英在北省得利彼所尤喜不須別籌抵押而我增此西方枝路兩條益處甚多中國各鑛若無洋人合股代開既無精鑛學之良師又無數百萬之鉅本斷不能開出佳鑛煤鐵暢行亦我之利二也一山陝鐵路鑛產英人視之素重必能歆動可抵粵漢但須借款而路由我造如蘆漢用比款例卽無他慮其次則准其在雲南邊地與我合開各鑛滇山險遠中國機器不能運入華人自開斷無暢旺之日彼由緬甸鐵路運機甚便三也至索地一節或

舟山或深水埠舟山雖小但聞法國水師訓條英踞舟山法卽踞瓊島牽動太多深水埠若屬英則香港北岸陸地與粵省接連若不准英造鐵路較舟山之禍稍緩然占地終不如許以他事耳總之英無妄求甚善設真如前所傳借款押釐金則利權失造粵漢路則腹心潰入長江則各省震擾踞舟山則法效尤必宜峻拒別以他項羈縻全局安危所關較之俄德禍機尤緊洞非敢越俎妄言特恐英猝然發難彼時諸事秘密外省無從聞知敬抒管見豫爲上陳以備朝廷采擇此皆抵制下策不過較勝無策廟謨深遠自有權衡儻非萬不得已

即所擬三條亦不如不允之爲愈且三條亦非必全許也值此危局宵旰憂勞寢饋難安不揣冒昧密陳迫切惶悚請代奏敬二

致總署

光緒二十三年十二月二十四日酉刻發

文電諭旨恭悉連橫爲患誠爲可慮中國此時豈能遽以力爭且各國作用雖殊皆是乘機謀我豈敢深信所謂聯者不過設法羈縻免多樹敵耳所謂藉聯倭以聯英者恐英要求太橫可託倭居間婉商減其貪欲凶餓倭實有唇齒之憂深恐中危西強彼必不保情詞惶急我若託之彼當肯助力勸解非爲我乃自爲也且彼力

言不索酬謝語甚堅明可否由總署往晤日本公使察其意指以備英人發難時居間排解之用似乎有益無損倭將所有深談乃向委員密語洞晤時但以冠冕語答之絲毫未及他事斷不致上勞宸廑惟彼言深悔前年不應與中國戰爭今願我遣人赴東入各種學堂云云則甚嘉許之謝其睦誼厚情耳請代奏敬三

總署來電

光緒二十三年十二月二十九日到

蒸三電敬三電均代呈遞已奉電旨知照本署查敬電英忌俄德占地我不聯英英必自圖占誠確論日英自聯已久歐洲人論東方局勢俄法爲一局英日

爲一局信不謬德本勢孤近與俄聯甚固膠澳之役
日本謂德爲俄前驅情詞畢見俄餒日熾各國畏忌
日英尤切其欲聯我無非藉我爲屏蔽無資於我也
既與聯則必有密約日英政出議院斷難久秘一經
傳播中俄之交絕德法乘之其禍不可思議俄地接
壤且有歸遼之助今又聯日英而拒之前後三年矛
盾若此恐環球各國皆不直也憶壬辰癸巳之間英
以帕米爾事密議相聯拒俄我如其意不遺餘力詎
英自規利益潛與俄盟割什克南羅善兩部落畀俄
而訂界約曾不告我一言約成而悉其詐此聯英之

前車也日本狃於遼役民志日驕其二三老臣尙以爲懼其於我誠有唇齒之勢馬關約定我亦大度處之非如法德仇怨之狀然中國受害之深實緣日本近以德事各國環伺機局危迫東方太平之局幾不可保日英求聯皆游士兵官之言該使從不稍露端倪聯之一事甚不易言各國風俗通政教同相聯甚便中外事事隔閼難爲密謀祇可遣使各國商保東方太平之局則不聯之聯不致激成東方戰局統俟籌定請旨遵行豔

致總署

光緒二十四年正月初二日申刻發

沁電奉旨英借款俄借灣正在未定已飭總理衙門從
長計議等因欽此仰見朝廷深知此兩事關全局利害
未肯輕允或疑倭方指款待用未易商緩竊以爲不然
和約明載六次交納不論何時均聽中國之便斷無強
索速還之理但聞倭人來問此款今年還否以便修理
兵房明是聽我之便何必轉借英款受無窮挾制貽全
局大患英若由緬甸造路入滇川達漢口漢以上用鐵
路漢以下用兵船直貫長江則江以南十二省全爲英
有矣西報言此款以長江一帶抵押須認真保守免爲
別國所佔云云明是兵船入江占踞險要代我保護蓋

英款借則長江失腹心既潰此卽所謂瓜分之局無所謂東方太平之局矣必須先將借英款一事決議謝絕再徐籌搪抵此次英索之策如英必強我借則如洞前敬電所奏借款練海軍修山陝路我尙有益且無抵押之害至俄踞大連最爲禍本英必不甘法必效尤然俄防英之隱衷必有以慰之可否與俄密商將大連灣暗借俄爲兵埠許各國爲商埠我卽借俄款修吉林至大連灣鐵路密與俄約大連灣准我隨時暫屯兵船多少不限數以避永借名目但禁陸兵登岸插旗我自修極大煤棧數處屯煤以供俄用他國護商兵船限定每國

不得過兩艘惟言明此路須用窄軌以便我由關內運煤接濟我允代造窄軌車數百輛於境上專備俄人入境換車之用其運費力從讓減照俄本國公司運載該國官兵官物章程收費是此灣此路俄得屯船運貨之利我得口岸鐵路商稅之利此路西通歐洲商稅既旺必較上海道關稅加多而華路短俄路長俄利亦大俄有屯兵之實英無藉口之資英若不滿則或以附近之海陽島借之該島亦可屯船取淡水或是解圍一法若許俄占灣彼必自造鐵路通吉江之路路成後彼自在灣運貨收稅無論各國爭與不爭我遼東之形勢隔絕

此一路之商稅大利盡棄矣總之兩事皆係大害英借款尤關中華安危必謝絕英款然後有可補救迫切上陳務懇聖明堅持定見詳慎計議萬萬勿借英款大局幸甚請代奏沃一

致總署

光緒二十四年正月初二日申刻發

聞德尙不肯撤兵外部堅欲修山東鐵路開山東鑛方肯息事曷勝焦憤是膠灣占而教案仍不了狡橫極矣洋報載德總領事自言德將以山東鐵路爲吸取全東地利深入豫省中原之根其說甚詳計甚毒中外皆見此報明是見英吞長江彼嫌膠州一隅尙小故得步進

步觀我中原萬不可允總以能阻止爲善如慮空言峻
拒彼恐不甘洞去年十一月卅電奏曾擬有一條云德
使遣員來商欲攬江甯蘇滬鐵路借款利息五釐二毫
八本息均攤在內六十年還清利息尙不喫虧等語如
萬不得已似可以此甯滬之路抵換路從滬起爲患較
輕但如議此路須令盛京卿與之議章程立合同則是
歸入公司商家辦法庶稍有公道且可防弊若總署與
議則變爲教案條款必奪我路權矣敬陳以備朝廷采
擇請代奏沃二

致總署

光緒二十四年正月初四日辰刻發

沃兩電奏因山東若允德干鐵路事北省地利大失引
寇入室逼近畿輔故擬以甯滬南路抵換之議查南路
據海使遣人送來原議章程係由銀行商請雖亦借款
然權歸中國總公司非同東北之俄西南之法強預我
事強奪我權不同者一款係由德之德華兼有英之匯
豐兩銀行分借願出於商非同彼國家出面強借且款
出兩國非同一國之權擅利專在我尙可施操縱不同
者二滬爲通商大埠從此起點非一二國所能專主且
此亦中國必應造之路非同山東之可以緩造不同者
三至息不過重尙是小事總之路可造被迫而權屬他

人者不可造款可借被迫而貽害大局者不可借似北路尙不如南路之可允矣但不知議結教案時於鐵路一條總署如何措詞此事可否并諭知盛京卿以便籌商挽回沃電於兩國商款各節聲敘未詳兼有未盡之意謹補行聲明以備朝廷采擇請代奏支

致總署

光緒二十四年正月初七日申刻發

洞沃電奏請力阻德造山東鐵路計已上達頃聞容閔呈請造鎮江至天津一路報效百萬不勝惶駭查膠州至京止一千四百里容閔路必經濟南省城德路由膠至濟止六百里容閔來自美國且事前卽報效巨款必

係洋股無疑即使間有華商而在美之華商財產多與洋人合夥物業歸洋人保護仍與洋股無異且不僅美商鐵路股票展轉售賣各國洋人皆有雖容閩本無他意但關涉洋股容閩將來亦不能自主容路短而款足不過兩年必成德路直接容路一年必成此路成後德之陸軍長驅而北一日而至永定門矣容路既係洋股將來必與德國句串斷不聽中國指揮一旦猝有變故如強占膠灣故智防不及防戰不及戰避不及避從此京師豈有安枕之日危險萬分本爲催德撤兵而彼要挾造路今允其造路是自召德兵也或謂東境之路我

多造則德少造似可限制德路不知客路係洋股路卽與洋無異正是爲虎傅翼若欲限制惟有告以山東路我必自造但此路久已議定應歸奏派之總公司承造尙可推緩數年以觀時局急圖補救備禦之法若兩年之內德路已通京城蘆漢之路至速尙須五年且客路在東方自樹一幟占盡路利比款必將翻悔不肯交銀則蘆漢路必因此而廢設有緊急雖欲調兵入衛亦來不及國事真不堪設想矣總之德索山東造路萬無可許之理無論彼如何要挾無論許以何項利益其患皆較緩儻德路可達京城乃眉睫之禍也若爲抵制德路

起見則以容路爲抵制不如以總公司爲抵制尙有辦法亦無流弊至容閔乃爲洋人所欺容路卽係洋路無論德路造與不造容路皆不可准准之必爲全局大害將來總公司蘆漢粵漢鐵路成後並准兼造東路洞必能勸諭公司各商報效巨款萬不宜受飾詞報效之愚事關宗社大計不敢避煩瀆之咎迫切上陳伏望朝廷熟思審處令王大臣及南北洋大臣從長計議力拒德路容路以固根本而安輦轂國事幸甚惶悚瀝陳請代奏陽

致總署

光緒三十四年二月十五日戌刻發

本月初六日間漢口洋商有出賣中國借款股票者係新借匯豐德華兩銀行千六百萬鎊之款四釐半息八三扣當詢之各洋人並飭關道查詢果確且聞洋人傳說以蘇浙江西皖鄂等省沿江釐金作抵或貨釐或鹽釐雖未確知總必有抵扣之款聞之不勝焦灼驚駭馬關約載明後一萬萬兩分六年還是今年第一次止應還一千六百餘萬兩乃係照約辦理彼不能責我全還且日本現與中國有唇齒之憂決不肯過爲催逼何以不欠無折扣無抵押之款而別借有扣有抵之款若謂一次盡還倭款乃可撤威海之兵竊思俄借族大德踞

膠州永遠占我土地奪我事權倭兵雖暫駐威海有何妨礙且俄德橫暴很毒遠勝於倭倭兵在威海梗於俄德之間則俄德不能合勢占盡北洋門戶今日事勢非專以驅倭兵爲上策明矣洞於上年十二月廿四日敬電奏會將倭款不宜全還痛切瀝陳在案中國財賦之區蘇浙爲上長江次之西人垂涎久思干預今因借款用彼人掌釐務必謂藉西人之整頓杜華官之中飽不知蘇浙長江利權全入其手中國之精華已竭豈僅干預而已且此數處進款京餉洋款協餉本省餉均出其間一日全歸西人扣抵借款則我之內政何從舉辦前

年四國洋款何從籌還束手自困永無復振之望餉源
既盡武備全撤大亂將作內地亦不得安又咸同間與
各國議約洋人不得干預鹽務今無端委棄前功亦太
可惜如果此事爲強敵所迫誠屬無可如何今日本並
不逼我全還一萬萬何必自取禍患洞反覆思之不解
其故伏望朝廷與王大臣熟思利害力止借議以救危
急或謂外省既已售票必係已成之議然聖心果決必
尙可設法罷議倭款照約分期籌還斯爲上策如洋人
必不肯改議或與之婉商令其今年先交銀一千數百
萬兩足敷今年應還倭款而止餘款緩交緩還以便詳

籌辦法卽或此款必借只可分派各省分攤籌還如前
年分還四國洋款之法有釐金作根蒂尙可稍資騰挪
添湊萬不可令洋人代我收鹽釐貨釐自失利權以後
諸事束手人心驚疑渙散總之不借爲上借而不失東
南利權爲次失利權以還不索之債爲最下或改爲他
項用款如速練海軍多設槍礮廠之類尙於自強有益
日本之款另籌分還之法洞受恩深重職居疆吏此舉
關係中國全局安危不敢不披瀝上陳不勝惶悚迫切
之至請代奏咸

總署來電

光緒三十四年二月十九日到

咸電悉借款以釐金作抵由稅局代徵誠於地方官不便第自去夏議借以來不如此辦法洋商必不肯信借款終歸無成戶部亦更無他策可以籌此巨款至賠償日期前已電商日本未允展緩若照數分攤各省今春一期斷難湊集以後各期更難設措彙總付還益屬無望現在各國從旁環伺以償款之能否清還決中國之能否自立如有愆期貽誤爲患何堪設想不僅利息不能扣回威海不能退兵已也兩害相形則取其輕共諒苦心大局幸甚原撥鄂釐協餉戶部當另籌撥候奏明咨會效

張文襄公全集卷七十九終

吳縣周仰公校

張文襄公全集卷八十

電奏八

致總署

光緒二十四年閏三月初九日亥刻發

電旨恭悉奉旨陛見亟應欽遵迅速起程惟湖北現奉新章開辦之事甚多紛紜艱難驟少一百數十萬鉅款眾情惶急減營籌餉兩端尤爲棘手必須與撫臣司道等籌酌大概辦法務求地方安帖而洞自冬臘以來卽患欬喘不寐頗類怔忡精神疲敝闔城僚屬共見以時勢艱難不敢請假休息現在部署一切尤爲艱苦實無一毫欺飾惟有力疾晝夜趕辦將經手事件略爲清理

大約十數日後即可起程不敢遲延再洞愚昧本無所知朝廷既有垂詢之件如有事須急辦而可以宣示者可否先爲諭知一兩條以便隨時豫爲籌擬上陳不勝惶悚請代奏佳

致總署

光緒二十四年閏三月十二日亥刻發

電旨恭悉瞻望闕廷亟思趨赴以申瞻覲之忱謹當迅速料理擬於二三日內起程無論病愈與否至遲十七日亦必力疾起程不敢稽延請代奏文

致總署

光緒二十四年閏三月十六日寅刻發
自上海發

昨晚奉到二十四日電旨謹當遵旨卽行折回湖北因

各國領事約期二十七日陸續接晤并須答拜擬二十
八日卽自滬行再日本派兩兵艦之說詢據總領事云
其一名高雄較大不能到沙市本係到漢口游歷者非
爲沙案其一名愛宕較小未來可函阻之沙市日本領
事言語甚和平不至要挾謹附陳以慰宸厪請代奏宥
致總署

光緒二十四年四月十二日亥刻發

洞於初八日抵鄂現已遵旨回任沙市案巡撫譚已飭
獲犯嚴辦疊經電奏現惟議賠款事武漢謠言甚多人
心不靖洋人異常驚惶現正力籌鎮撫事宜俟地方一
律安靜再行請旨請代奏文

致總署

光緒二十四年七月十八日戊刻發

奉六月十九日寄諭令於上海漢口設商務局飭江督劉與之洞揀選員紳試辦慎選有人卽行具奏等因此事乃今日要政上海爲沿海總匯漢口爲上游要衝鐵路樞紐自應分設兩局上海由兩江委員開辦漢口由鄂省委員開辦湖北擬委道員王秉恩並另電奏調江蘇候補道程儀洛會同總理漢口商務局以鼓舞聯絡上游川陝雲貴湘粵等處工商爲要義並選殷實誠信通曉時勢之商董數人爲總董會同商酌其商學商報商會及講求工廠製作商貨銷路等事江楚兩局各自

籌辦遇有應行聯絡貫通或應互相協助之處隨時知照會商辦理雖分爲兩局仍聯爲一氣當隨時與江督劉商籌酌辦再查商務事體所重在商而不在紳緣漢口之商外省人多本省人少但取其熟悉商情勢難拘於本處紳士合併聲明除詳細情形具摺奏陳外請代奏嘯

致總署

光緒二十四年七月十八日戌刻發

查江蘇候補道程儀洛廉正核實不辭勞怨現在請假在原籍浙江紹興府仰懇天恩飭下兩江總督浙江巡撫飭該道迅速來鄂所有商務局及農工各局均可飭

令籌辦實於新政要務大有裨益除另片具奏外查各局亟須開辦如蒙俞允可否懇降電旨諭知以期迅速不勝惶悚請代奏嘯

總署來電

光緒二十四年七月十五日丑刻到

奉旨張之洞電悉該督遵設漢口商務局辦理迅速籌畫周詳深堪嘉尙江蘇候補道程儀洛著劉坤一廖壽豐飭令速赴湖北交張之洞差遣委用欽此號致總署

光緒二十四年七月十八日亥刻發

諭旨籌辦學堂查湖北省城前數年卽設有自強學堂去年又加擴充分習五國語言文字兼習算學又設武

備學堂均經奏明省城有兩湖書院去年春卽改章又有經心書院今年春改章分習經史地理天文外政格致製造繪圖算學諸門日日須兼講四書此係省城兩大書院均略仿學堂章程現擬添設東文教習令一律兼習東文其願兼西文者聽因西文須三年方能粗通東文一年餘卽能領解并令兼習體操所有章程須以漸修改方能精密而易行省城又有江漢書院現亦飭令改章至省外各屬湖北通計十府一直隸州現擬先設十一學堂各就該書院原有經費齋舍改爲學堂武昌漢陽德安三府之府書院去年秋今年春均已停課

時文分習算學時務現飭全照學堂章程此外八府州一律改章惟一時斷難得教習多人每堂先設教習二員一教中學經書史事一教算學洋文如各該府能自行延訪通曉西學西政之師則多設教習數員尤善須一年後方能漸臻周備此外通省六十七州縣已飭一律就原有書院改爲學堂惟州縣書院經費尤少斷難敷一學堂之用多無肄業生齋舍有者亦止數間尙須籌款充用且州縣小學堂尤須多設每縣一堂亦無大益只可相機董勸總之通省學堂公共簡要章程約有數條一全須住院一住院肄業者必須二十五歲以下

附課者不拘一人人須習算學能兼繪圖尤善一人人
須習體操一各府學堂人人須習東文有西文教習者
兼習西文縣學堂從緩俟兩年以後通東文教習漸多
卽分發各屬一律兼習一中國經書中國史事人人尤
必須講習一但計分數不考詞章一堂內備火食每月
課略有筆墨獎賞不給膏火銀此八條各學堂皆同惟
省城學堂所講較深外府較淺縣學堂又較淺外府學
堂今年內可略具規模縣學堂今年只能令先變舊習
先發粗淺算學書粗淺時務書數種令其閱看籌有學
堂屋舍訪有教習方能合學堂章程大縣較易僻縣較

引之集卷之十一
三
難期以明年六月必能一律辦成只能量力經營循序
漸進總之科舉既變風氣自改務求實效不在欲速查
湖北省城書院兩年來本已漸次改章酌照學堂辦法
祇以俗儒迂陋相沿勢難驟變今奉明旨自當竭力推
行惟設學堂之難有兩事一延師一籌款而延師尤難
其籌款之法容另行奏陳謹先覆奏請代奏之洞繼洵
同肅嘯

總署來電

光緒二十四年七月初四日酉刻到

奉旨前於五月廿二日降旨諭令各省開辦學堂限
兩箇月覆奏現在限期將屆各省籌辦情形若何著

各督撫迅卽電奏欽此江

致總署

光緒二十四年八月初二日申刻發

奉旨藩臬道府凡有條陳專摺具奏州縣等官由督撫
原封代遞士民上書言事徑由道府代奏等因欽此當
卽通行司道府州縣一體欽遵謹電奏請代奏沃
致總署

光緒二十四年八月初八日午刻發

山海關至牛莊鐵路密邇京都關繫最要聞已與英商
匯豐議定借款爲俄所阻查此路自以我自造爲上策
路止數百里可枝枝節節而爲之官款與借款參用隨
造隨押隨押隨借款止數百萬兼借英款及美款則全

係我作主路權不失俄自無詞萬不得已則莫若借英款爲中策俄已握東三省鐵路之權旅大一帶水陸之兵日增若阻借英款將來必勒我借俄款俄路抵關京城一日不能安枕危險萬分若借英款造此路使俄從中有阻隔彼尙有所顧忌牽制惟與匯豐議借章程亦必要妥善俄沮英者以英人管路也此路自不宜使英人干預路權俄方能允似可與英使及匯豐言明此路係商務借錢還錢且不必將鐵路作押如恐將來借款無著落則由中國國家擔保撥官款代還斷不可使英人管我路權此路借款條約須與從前各路變換面目

迥然不同則我亦有辭以謝俄俄亦不能責我矣以此情與英使婉商庶可聽從至造路兼開鑛一層斷乎不可路與鑛是兩事豈可牽合爲一流弊太大近年俄於東三省德於山東鐵路皆兼開鑛者乃係因有交涉事件而起故不免要挾與此商務借款不合何得援例如關外有煤鑛可開將來臨時斟酌另案另議總之交涉乃國家事與商務截然不同不可相混此路借款作爲商務不作爲交涉路權方可不失聞英俄已有戰事我自宜謹守局外萬不可稍有游移若此路章程妥善則我免大害英可稍慰俄亦不怨然不如我自造爲妥謹

密電奏伏乞聖裁請代奏庚

致總署

光緒二十四年八月十四日未刻發

鈞署電傳八月初十日 上諭如有精通醫理之人著
內外臣工保薦卽日馳送來京等因欽此曷勝瞻仰懸
系惟查湖北省良醫素少是以之洞十年以來遇有疾
病皆只自行調理不敢延醫服藥目前實無精通醫理
之人不敢冒昧保薦容各處訪問如得其人卽奏明馳
送赴京請代奏鹽

致總署

光緒二十四年八月二十五日辰刻發

鈞署電傳二十一日奉旨湖南省城南學會保衛局等

名目應卽一併裁撤會中學約界說剖記答問等書一律銷燬等因欽此當卽電飭湖南藩臬兩司欽遵將南學會保衛局卽日裁撤學約等書飭將版片印本查齊一律銷燬已據該兩司電覆卽日欽遵辦理並據稱南學會自四月底卽已停講現將在事人等卽日裁撤等語謹先由電覆奏請代奏有

致總署

光緒二十四年九月十五日辰刻發

陽電奉旨恭悉鈞署真電亦奉到查今日中國練兵誠爲第一要事惟各國皆思干預我兵權亦是大患大率用洋人爲教習則可用洋人大員爲將領則萬萬不可

洞前在江南所用德遊擊來春石泰等十餘員練自強軍因係外省疆臣自行商募我出使大臣保薦既不與該國國家相涉又非先經奉旨飭辦之事亦非鈞署飭辦之事故尙可聽調度然期滿遣歸時枝節已多至鄂省所用德都司法勒根漢因係其國家兵部所薦種種桀驁攬權生事公使屢次扛幫幸而遣歸今英國貝思福明言派知兵大員又經奉旨此事萬分難處爲害極大鈞電所言似有深意非尋常教習練兵可比囑探其隱情等語洵爲卓識其情顯係欲攬長江兵權不探可知看此情形全不允必不行惟有切懇鈞署及早與之

議明一官不可大至大不得過守備官大者洞斷不用
一到鄂須言明爲洞屬員聽節制一其名只爲教習一
諸事與營務處道員商辦一湖北餉絀兵少只能先撥
練軍五百人荊州駐防五百人令其分劄教練俟教有
成效並餉能多籌再酌議能否加增由洞斟酌彼能依
此五條方有可商若鈞署不先議定將來該英提督到
鄂必以奉旨強勒長江利權今已半歸英人又兼攬長
江兵權尾大患深洞實不敢當此重咎并望告該提督
彼既係相助好意然來湖北練兵若強洞以所不願弁
兵豈能悅服查英欲助我練兵其謀已久漢口稅務司

自去冬至今夏屢次來勸洞總以人數權力限之今果到京欲以朝命行之其心可見遵示詳籌利害上陳伏望朝廷俯念長江上游重要由鈞署與該提督在京迅速切商示以限制萬勿遽行允定大局所關迫切叩禱請代奏咸

總署來電

光緒二十四年九月初七日戌刻到

奉旨據英國議紳水師提督貝思福以中國練兵爲要與總署王大臣面商願薦將弁教練先從南省辦起著祥亨張之洞早爲預備於駐防營挑選一千名練軍各營挑選一千名務期年力精壯一律整齊俟

所薦洋將到鄂再與詳議章程派員會同督練以觀
後效欽此陽

又 光緒二十四年九月十二日子刻到

貝思福與談數次據云欲派一知兵大員助我整頓
華軍此非尋常洋教習練兵可比似有深意彼如到
鄂議及希探其隱情及此中利害詳籌電復真

致總署

光緒二十四年十月十八日酉刻發

粵漢鐵路美工師已到鄂催同勘路並請切實保護現
擬自武昌至長沙由湖南入廣東派員帶同中國總公
司所延之美工師往勘路基惟湖南廣東內地少見洋

引之集卷之二
人深恐莠民造謠妄生疑沮擬請明降諭旨曉以國家
特派總公司會同各該省督撫籌造湖北湖南廣東鐵
路實於國計民生皆有裨益務須剋期成工不容延緩
庶民心開悟地方官保護較易現美工師即日由鄂啟
行請代奏之洞宜懷謹肅嘯

致總署

光緒二十四年十一月初一日戌刻發

英議紳貝思福九月十四日來見言湖北練兵二千事
開端卽云東三省俄勢已盛中國可慮各國皆欲分占
地方惟英願助中國練兵以保全中國兼保英國商務
詞甚堅悍洞當以英員之權應有限制各條商之貝初

願甚奢隨後語卽漸近情理囑其開詳細章程來始可
定議貝允卽開送洞又詢以練兵旣爲保全中國起見
自應先在北省保京城何以來南省舉辦豈有所畏於
俄而出此耶恐英發端於南俄卽效尤於北將如何貝
云我在京原議乃從湖北練起非僅練此二千第三日
來函並不開章程但云必先在京城設軍務處聘英將
爲參謀籌擬章程整頓中國全國軍務隨時隨同中國
大員巡閱各省軍營方能有益若僅在外省練兵反招
他國效尤有損無益云云當復以洞在鄂止能言鄂議
練鄂兵則可全國軍務不敢置議廿一日又來見詞氣

忽極和平再與言鄂省練兵二千章程彼堅不肯議請
作罷論止申京城設軍務處聘英參謀一說卽詢以外
省練兵尙恐他國效尤全國練兵豈不慮他國干預彼
云英員須由英廷薦舉非彼一人能自薦彼止條陳而
已昨接英相沙侯信言中國若請英廷薦員練全國兵
若別國干預英必竭力相助固知全國之事非外省所
能越俎但不知能將此意代達總署否等語答以代達
則可行否仍須聽政府核奪各國均屬友邦我若注重
一國不知能不招猜疑否且須詢明不損中國權利方
可轉達否則仍是不敢卽以限制各條詳細詢之一中

國請英國薦員練兵非請英國代爲練兵英員到華卽是華官不能藉勢要挾一京中英員名爲參謀歸王大臣統屬止能參謀籌擬章程候王大臣核定咨行英員不能行文調度賞罰不能照總稅務司辦法一外省洋員歸督撫統屬與營務處商酌兼用他國人員以免猜忌並不拘定均由彼薦舉兼可由我訪募若中國原有將官練洋操好者不能更換彼均欣然首肯謂與彼意皆相合卽赴金陵並商之江督亦請其轉達總署等語廿二晚已行廿六日已晤江督究不知是否真情如照此說英將止參謀不攬權外省洋員不專用一國人不

拘定由彼薦舉似尙無大弊惟英俄互猜在京聘英員
參謀不審有無窒礙似尙須籌一善法但貝旣云此事
非彼所能作主僅獻條議故姑不拒絕略詢辦法以示
羈縻待緩察彼國之意從容酌辦若將來必須舉行而
在京城不便或囑英員先來南省先作一省督撫之參
謀俟一兩年後由督撫察其果就範圍再行保薦入京
似亦推宕之法也再洋人來華無論如何與約無不攬
權把持卽如海關三十餘年從不用一華員隨同練習
要務以致無人接替永無收還之期可爲前鑑此次與
貝議問其幾年後方可不用洋員彼云十年此條最要

將來與議必須訂明十年以內洋員之權雖或稍重十年以後仍全歸我尙有限期然若不趕緊派人出洋學習武備屆期彼將藉口我無人接替必不歸權英人之於印度營官以上均用英人士人只許爲兵弁彼意所在概可見矣竊以爲今日練兵固急而派人出洋練將尤不容稍緩蓋有將不慮無兵有兵無將仍屬虛設此節亦曾與貝談及將來總須一面派人赴英學習以免多派英員且可俟學成後陸續抵換英將實爲要著謹遵總署真電詳籌利害瀝陳管見以備朝廷采擇請代

奏東

總署來電

并致劉制台
四日丑刻到

光緒二十四年十一月初

奉旨張之洞電悉英議紳貝思福商詢各節京城設
軍務處用英參謀一說斷不可行將來如果來京商
辦應仍照原議就鄂省先練二千一切薦員教練歸
我節制臨時由該督妥慎籌酌務須預防流弊操縱
在我貝思福現赴江甯並著劉坤一卽本此意應付
以免兩歧欽此江

致總署

光緒二十四年十一月初七日戌刻發

昨奉密寄拏康有爲梁啟超王照及附和邪說顯爲黨
羽之人自當欽遵密緝查康梁王並未在中國前於未

奉廷寄之先十月十七日日本總領事小田切來鄂之
洞當與詳言康學種種邪僻悖亂中東兩國現在極敦
和好諸事聯絡而康黨得罪中國朝廷聞現逃至貴國
東洋距中國太近必至造言煽惑勾串我內地奸民變
亂是非滋生事端若貴國容留於中東交誼大有不便
以後豈敢深信儻能交出或驅逐方顯中東親好實據
小田切云日本政府及該總領事並不以康爲然惟彼
既逃往西例不能不加容納若中國明行文索取及驅
逐該國勢難照辦轉多窒礙該總領事爲中東大局起
見當卽密電政府商之必可令其去東旋於十月二十

四日接該國外務大臣青木密電令其轉告之洞其文云康黨所爲本國政府無所不知伊等現自來厲本國政府並無庇護伊等之意惟因萬國公法有例不便強令伊等去國若強令出洋日本被背法之名而取羣國之笑然旣承雅囑本國政府自應相機設法令伊等去國等語當令人密問小田切何法令其去東小田切云令人諷伊自去赴美國日本政府助以川資問其日期小田切云難定近或一兩禮拜遠亦不過兩月此語已十數日當已辦有端倪傳聞康已赴美惟王梁尙在日本不知確否當再函託小田轉致日政府促之竊查康

黨若在日本實爲中國大患若遠離日本雖未能獲似亦較勝至湖北地方經之洞力持切諭向來康說不行凡官紳士民無不深惡康黨痛詆康學者指爲邪教亂賊斷無附和康黨之人謹密電陳請代奏陽

致總署

光緒二十四年十二月十三日申刻發

據署荆宜施道恭釗荊州府舒惠電稱初九日小北門外旗民互鬥民傷七人旗傷一人初十日理事同知鍾福江陵縣劉秉彝到旗營驗傷彼此爭辯傷痕以致哄鬧毆傷縣差鍾丞劉令前赴右都統署旗兵擅入毆傷鍾劉將軍都統在坐彈壓不服現已散餘詳稟等語同

日接將軍祥來電則謂係因忤作報旗傷不實兵心不服未言毆官情事江陵縣來電則謂槍傷民人七名旗兵一名自稱槍傷旗兵爭辯該縣諭令俟將軍另委覆驗不允傷夫役二十三名復將理事同知及該縣毆傷請另委大員驗訊並委縣接署等語情節參差查理事同知乃國家定制專管旗民交涉之官何得不服查驗該同知該縣如果驗傷不實儘可稟請委員覆驗何至入署毆官現經之洞委道員札勒哈哩知府吉爾哈春連捷帶忤作二人於昨日乘輪赴荆會同道府理事同知知縣秉公覆驗查訊確情通稟會商將軍妥辦以免

滋生事端江陵縣現已另委員卽日前往接署並商將軍會奏頃接將軍電已先具奏謹由電上陳請代奏元

致總署

光緒二十五年正月二十一日午刻發

近見日本新出清議報乃康黨梁啟超所作大率皆謗議中國時政變亂是非捏造誣罔信口狂吹且載有各國瓜分中國會章程一則種種悖逆令人髮指意在惑亂人心挑動強敵必欲中國立時大亂而後已險惡已極洞已告日本領事不准日本人在漢口分送此報領事已允一面電上海日本總領事小田力阻在滬分送並囑小田力商日本政府速將康黨遣去不可容留查

康黨人在日本去中國最近而日本士人通華文者甚多易受其欺此報流傳海內外中國人見之人心易致搖動各國見之必將益啟欺凌煽惑肆毒爲禍匪細非迅速驅逐遠去必爲大患擬請旨密諭出使日本大臣速與外部婉切相商令其設法將康有爲梁啟超王照三人速遣出境以免肘腋之患方足見中東親好之誠若此三人驅至美國此三人不通英文英語彼國亦不好中國文字卽不能爲大患矣如此辦法是否有當請旨遵行請代奏馬

致總署

光緒二十五年六月十六日己刻發

奉旨查詢各省機器製造等局查湖北奏設製造槍礮廠近年又奏設煉罐子鋼造無煙藥廠情形俱隨時奏報至較準膛口各節及造出械彈數目當另行專案具奏又湖北紡紗織布縑絲等局均經奏明皆係官商合辦因查外洋綢布多係攪麻製成不盡用棉與絲物賤利豐中國南北各省處處產麻湖北麻素佳因又於織布局旁設製麻局以輔助之藉以開中國之風氣各廠工徒數千人此因洋貨日多民生日蹙各廠皆係爲塞漏卮養窮民計至湖北去年奉旨設農工商局設有工藝局以教貧民手藝設有農務局以教種植蠶桑畜牧

皆聘有洋人爲教習卽係前年奏設之農工學堂又設有商務局專出商務報以達各省之商情以考土貨之盛衰暢滯去年亦專案奏明此農工商三局皆係教民習藝業救貧困均與機器製造無涉請代奏諫

致總署

光緒二十五年十月二十七日辰刻發

養電奉旨京師創設銀元局特調候補道王秉恩來京開辦一切局務飭令於穿孝百日後迅速來京等因欽此當卽轉行該道欽遵據該道稟滿百日後已在臘月內俟正月底二月初開河卽行迅速赴京請代奏沁

致總署

光緒二十五年十二月二十九日卯刻發

十一月洽電奉旨令將關稅鹽課釐金裁去陋規提充公用查覈酌提數目電覆查湖北關稅一項洋關三處江漢宜昌兩關歷年遵照部文於節省解費內歲解加復俸餉共一萬四千本年又遵部文於傾鎔折耗每兩減去六錢每年共約一萬四千光緒十年江漢關自行詳請歲解節省解費五千宜昌關自行稟請歲解節省關用三千三百餘兩沙市關關用尙且不敷係借宜昌關款應用常關四處新隄竹木關於光緒九年十年十一年疊次節省外銷公費加解額外盈餘每年共六萬一千餘兩武昌船關於光緒十二年節省每年公用

銀一萬又加每年口岸節省銀六千荊州道船關民船
日少收數日絀荊州府稅關因沙市開關又兼地方蕭
索收數亦微鹽課一項光緒二十二年二十四年兩次
裁減緝私經費一萬八千釐金一項光緒十一年奏明
將外銷一成善後經費裁除歸入正餉並將向來局用
經費活支無定者減定爲八分此兩款每年所省約十
五六萬元光緒二十三年又奏明提充賞銀六千歸入
正餉以上均奏報有案又州縣丁漕平餘一款久經遵
照部文提解充餉目前各關各局各署皆無多款盈餘
不過免敷辦公現在竭力整頓釐金剔除積弊嚴禁需

索中飽查湖北釐金向係巡撫管理之洞自去秋兼管巡撫事數月正值川楚鬧教擾亂之時釐金收數已較前年加增蔭霖到巡撫任將及一年釐金收數又較去年加增尙未截數但只能於正釐內增多不能另有可提陋規名目蓋委員司事巡丁索取商人陋規或則寬縱賣放暗損於正釐之內或則需索留難誅求於正釐之外二者非病商販卽蝕公款皆於正釐有礙故鹽卡之陋規只能禁革不能提取陋規旣減正釐自增然正釐乃受無形之益並非別有陋規一項可提計鄂省十數年以來稅釐鹽課各項疊次裁節外銷歸入正餉者

爲數甚鉅除部文飭裁各省所同者不計外其由鄂省
屢次自行奏請裁提者新隄關六萬一千武昌關一萬
六千江漢關五千宜昌關三千三百鹽務緝私經費一
萬八千釐金充賞六千釐金外銷一成歸入正餉及局
用減定爲八分兩項合計約十五六萬總計裁提外銷
每年已在二十六萬以外似與他省未經多裁者微有
不同此外裁節鉅款如綠營額兵光緒十一年奏裁一
成六分有餘光緒二十三年奏明分年裁汰五成合計
將及七成查山東一省亦止裁兵五成各省裁兵未有
如湖北之多者歲省亦鉅是內銷用款但有可省亦無

不力求撙節查湖北省自上年鹽釐抵還洋款以後撥補無著之款多至三十餘萬現又准部文加派鎔價及東北邊防經費共二十九萬七千兩合計無著者共六十餘萬而京餉荊州滿餉洋款東北邊防甘餉萬不能誤尤屬萬分爲難夙夜憂灼不知何以爲計雖奏請戶部另籌撥補竊恐戶部斷不能撥補實款如此之多是以數月以來竭力多方籌餉於部文未到之先卽已籌議加抽菸酒糖三項落地捐土藥稅釐及整頓稅契等款另摺具奏冀以湊補若干稍紓戶部籌畫究竟能籌多少未敢預計然總不至全無成數總之能多籌一萬

卽省戶部撥補一萬能多籌十萬卽省戶部撥補十萬而所補之款大率皆係供支京餉荊州滿餉洋款東北邊防甘餉數大端之需實與提解部庫無異方今時勢艱難部庫支絀之洞蔭霖等仰覩宵旰憂勞豈不願多提巨款稍紓宸厯惟湖北情形實與他省不同一由近年裁提歸公之款已多一由目前撥補之款多虛加派之款又鉅奉撥各餉尙多無著正需籌補當早在朝廷鑒照之中實無餘力提款另解惟值此時艱大小臣工受恩深重分應稍效涓埃以盡微忱擬以後每年由督署捐助餉銀二千撫署捐助餉銀一千藩司捐助餉銀

一千鹽道捐助餉銀一千荆宜施道捐助餉銀五百漢陽府捐助餉銀一千二百荆州府捐助餉銀一千共銀七千七百兩按年發交善後局充餉造報聊以添湊撥補不敷之款至現奏整頓稅契一事卽係酌提州縣羨餘以資撥補之洞蔭霖惟有督飭司道力杜中飽節省用款嚴核正賦多籌餉源冀以支持窘局免誤要需謹披瀝覆陳不勝惶悚請代奏之洞蔭霖同肅豔

致總署戶部

光緒二十六年五月初三日亥刻發

欽奉寄諭飭議洋貨稅釐併徵一事竊查此舉若照盛宣懷等原議可歲增二千萬兩但恐各國未必允加至

此數然必可歲增一千萬兩內外實爲國家大利若不
予免釐恐時值加估及洋酒等物抽稅之說彼未必允
至進口土貨冒充斷無其事土貨出口正稅五分再充
洋貨進口又完併徵十五分共二十分是百金之貨須
先納二十金之稅無此愚商若洋貨易與土貨淆混者
儘可指明數十種粘貼印花且加稅之名甚正尤於國
體有益不僅籌餉目前中國局面尙可議加稅抵釐若
二三年後或各國生枝節或內地有變亂則此舉不能
再辦必至稅不能加而勒我免釐矣如慮洋關利權太
重請旨飭總署與赫德切商趕緊教習中國員生以徵

權之法數年之後漸次參用華人亦可防弊至湖北省
洋貨釐數猝難查清事關大局一省盈絀不足深論將
來查確據實奏請撥補鉅款充裕戶部必不吝惜此事
機不可失伏望聖明斷然行之因開議期近奏到恐逾
限謹先由電覆奏請代奏江

致總署榮中堂

光緒二十六年五月二十四日亥刻寄保定廷藩台譯出加封粘釘

專派弁兵飛遞京城同日照錄另由上海海綫寄
山海關副都統飛遞京城二十七日又照錄寄濟
南袁撫台譯出加封寄京並致慶邸

各國洋電皆以拳匪妄殺開衅我不速勦致動眾怒日
本電謂若肯勦匪尙有轉機京城危急北望焦灼查拳

匪符咒惑人傳教煽亂實不能避槍礮嘉慶十三年八
經諭禁若真係直隸義民何以陝西人李來中爲首是
爲邪教應勦一也不遵詔旨解散京外亂殺華洋均受
其害且要挾欽使請殺新城涇水兩知縣目無法紀是
爲亂民應勦二也旗書助清滅洋乃各省會匪故套若
助朝廷何以抗旨北自京城東至天津西至保定南至
河間周圍千餘里均被滋擾勒派供糧其中不盡教民
亦濫遭焚殺畿輔災旱民不聊生是爲土匪應勦三也
毀壞國家所設電綫鐵路值數百萬阻詔奏誤軍行又
焚毀京外洋房民房無算是爲刦盜應勦四也卽不與

各國開衅亦應痛勦況無故戕害洋人洋房殺日本參贊今海口已被占奪都城布滿洋兵增兵增艦日來日多禍在眉睫直不忍言從古無國內亂民橫行慘殺而可以治國者亦未聞一國無故與六七強國一同開衅而可以自全者卽英俄強國亦斷不能受各國併力之攻況官軍彈藥有限鏖戰日久我無接濟之械彼增數倍之兵江海各口俱封各國分路攻擾全局糜爛如何支持拳匪無械無紀在東在直皆不能敵官兵近日在落伐被洋兵擊斃無數在交民巷又被洋兵擊敗未見其能避槍礮若謂烏合亂匪能與大隊洋兵拒戰斷無

此事仰懇 皇太后 皇上聖斷念宗社之重速持定見勿信妄言明降諭旨力勦邪匪嚴禁暴軍不准滋事速安慰各使館力言決無失和之意告以已召李鴻章李到當與各國妥商辦法聞美國在大沽並未開礮先託美使調停勸令停兵息戰我方好專力勦匪並請速發電旨述 皇太后 皇上之意飭駐各國使臣令向外外部道歉日本被戕參贊優加撫卹力任以後保護明諭各省保護洋商教士眾怒稍平庶可徐商挽救宗社安危所關間不容髮再過數日大局決裂悔無及矣焦急惶悚秉衡等意見相同謹合詞籲懇聖鑒請代奏李

秉衡劉坤一張之洞鹿傳霖王之春松壽于蔭霖俞廉

三同肅敬

因道路梗阻分遞兩處一呈總署一呈榮中堂以冀必有一路可到併請電覆

會銜電奏

光緒二十六年五月三十日已刻發自江甯發

奉廿四日寄諭欽遵續准袁世凱密電奉二十五日寄諭拳會在津助官軍獲勝降旨嘉獎飭各省招集此義民成團禦侮必能得力辦法迅奏沿江海尤宜急等因欽此竊謂此次大患在與各強國一齊開衅目下大沽已失京都危急拳會僅持邪術各國非比流寇雖幸獲勝仗各國斷不甘心勢必增調重兵報復俄日兩國陸兵最多其來最速現俄用裝茶輪船改赴旅大裝兵英

調印度兵法調西貢兵美調小呂宋兵日本調廣島兵連德國陸兵當不下八九萬斷非董宋聶諸軍所能抵禦拳會無紀律可勝不可敗敗則四散以京師之重地作孤注之一擲危迫甚矣論兵力一國焉能敵各國不敗不止論大勢各國焉肯輸一國不勝不止豈有拳會可操常勝而無一敗之理鏖戰旬日藥彈必竭接濟無從更何能以血肉之軀與礮火相搏一旦兵敗會散各國大隊直入京城宗社乘輿何堪設想此臣等痛哭流涕不忍言而不敢不言不得不萬叩以請朝廷亟思變計者也沿江一帶會匪鹽梟安慶道友甚多與拳匪各

自爲黨平時專以搶刦爲事口號皆悖逆之語並無拳會之黨可招臣等已將防務密爲籌備但就目前計北事已決裂至此東南各省若再遭蹂躪無一片乾淨土餉源立絕全局瓦解不可收拾矣惟有穩住各國或可保存疆土江甯漢口英國領事迭來臣等署中面商欲派兵艦多艘入江保衛商教臣等以力任保護堅辭阻之該領事已允不再派艦上海各領事處並經飭令江海關道密爲轉商亦各允許蓋長江商務英國爲重各國覬覦已久懼英而不敢先發英亦慮各國干預而不敢強佔以啟各國戎心在我正可就其所忌而羈縻牽

制之若鼓動一國勢必羣起而攻大沽覆轍可深鑒也此實委曲求全之策現在尙屬安靜自可暫與周旋仍一面嚴密籌備惟沿江防軍甚單精械不能一律雖酌量增募利鈍仍無把握一經宣戰各國封我海口滬局軍火不能運出將士戰守奮勇亦無彈藥接濟沿海各省紛擾可慮防不勝防閩浙廣東兵力亦薄甲午以後存械無多從前法越之戰日本之戰開衅皆止一國軍械彈藥尙可設法分購密運勉支半年故一國尙可力戰若謂可以抗拒各國臣等誠不敢故作矜夸之語以欺君父而誤國家外衅一開內匪四起更難措手總之

能聯絡一日長江以內尙可使外人無從逞志儻各國
必欲以干戈從事派大隊兵艦來江攻我營臺實逼處
此臣等受恩深重有守土之責自當盡力抵禦存亡與
共事機甚緊所關甚鉅謹披瀝上陳再出使各國大臣
此時請勿遽行召回若使臣下旗回國卽是明言決裂
自認攻毀各國人命物產以後更難轉圜似宜仍令暫
駐各國爲宜合併瀝陳臣坤一之洞卅

樹相接當時京
畿文報艱阻以

後各奏多係電由
東撫袁加緊馳轉

致總署榮中堂

光緒二十六年六月初五日午刻
發交保定廷藩台飛遞

奉旨派兵赴京聽用鄂省前聞北警夙夜焦急本擬派

前南韶連鎮方友升統軍馳往入衛正在部署間奉寄
諭調武功二營愷字四營查鄂省向係底營每營二百
五十人此六營止千五百人兵力較單茲將各營湘軍
挑選並將愷營凡湖南人嫻習礮法者挑選併入其中
共成五整營二千五百人俱作爲武功營由方友升統
領概係湘勇湘將並與湘撫俞商定將鄂派五營與湘
派五營均派湖南藩司錫良總統兩省十營合軍均係
湘軍一氣貫注較爲得力卽飭令迅速陸續馳往謹先
電陳請代奏之洞蔭霖同肅敬

會銜電奏

光緒二十六年六月十六日未刻發

恭讀華洋電傳六月初三日寄出使各國大臣電諭詳示匪亂肇禍外艦相迫及力保使館情形理直辭正欽服莫名從此各國共知朝廷若非萬不得已不肯輕戰之本意自可忿情頓釋漸就範圍竊謂此時各省自應力籌戰守而朝廷必宜先伐敵謀恭繹此次諭旨之意擬請推行者四事一請明降諭旨飭各省將軍督撫仍照約保護各省洋商教士以示雖已開戰其不預戰事者皆爲國家所保護益彰聖朝如天之仁且中國使臣官員商民在外國者尤多保全尤廣一請明降諭旨將德公使被戕事切實惋惜並致國書與德主以待別國

排解並請致美法兩國國書以見中國意在敦睦一視同仁一請明降諭旨飭順天府直隸總督查明除因戰事外此次匪亂被害之洋人教士等所有損失人命物產開具清單請旨撫卹以示朝廷不肯波及無辜之恩義不待外人啟口將來所省實多一請明降諭旨飭直隸境內督撫統兵大員如有亂匪亂兵實係擾害良民焚殺劫掠准其相機勦辦一面奏聞從來安內乃可攘外必先令京畿安謐民心乃固必先能紀律嚴肅兵氣乃揚以上四條均仰懇明降諭旨並飭由各電局飛傳各省尤爲有益數日之間四海徧傳各國自然感頌朝

廷並請於 上諭中提明欽奉 皇太后懿旨字樣令
各國感頌 兩宮聖德此旨一降則我國家既自立於
情義兼盡之地步各國無可藉詞自然懈其憤鬪之志
散其連合之局此正古人所謂用兵攻心之法即使逼
至連戰不休更可表明非我開衅之實證合詞敬陳管
見伏候聖裁臣李鴻章德壽劉坤一張之洞許應騷善
聯劉樹堂奎俊袁世凱王之春端方葉未

會銜電奏

光緒二十六年六月十九日寅刻發
由濟南轉發

竊臣等屢接出使日本大臣李盛鐸電稱據日本政府
意見及各國公議謂此時各國專重救使一事必須將

各使救出方有排解之法等語聞各洋報及上海領事
言若使臣皆殲各國卽不以公法待中國竊思殺使無
纖毫之益有無窮之害伏讀諭旨屢言保護使館但恐
事機危迫防不及防貽禍大局實非淺鮮務懇 皇太
后 皇上極力將各國使臣救護可否明降諭旨飭令
四川提督宋慶派兵護送各使赴津洵爲安危利害之
一大關鍵宗社幸甚臣等爲力保危局起見謹合詞恭
摺由驛六百里加緊密陳再此摺係臣之洞主稿電由
臣世凱繕遞合併聲明臣李鴻章劉坤一張之洞奎俊
綽哈布善聯盛宣懷端方袁世凱效

會銜電奏

光緒二十六年六月十九日辰刻發
由濟南轉發

近日寄諭各駐使力言保護使館乃聞匪徒並不遵旨
仍然圍攻使館意欲聚殲其勢甚危不勝駭異焦急查
洋報德使被戕德主已誓師報復矢取北京各駐使來
電述外部語均極暴悍各國洋電上海各領事語均謂
今日惟以救使爲第一重大事中國若可救使將來諸
事方有可議若各使多傷則盡其兵力不留餘地不以
公法待中國等語竊思僅戕德使各國尙可牽制排解
萬一匪徒盡殲各使則是逼令合謀羣強眾憤後患實
不可測擬請明降諭旨特派忠實大臣及有紀律之軍

保護使館或專派宋慶一軍保護囑各使將國書之意
分電本國使知攻使係匪徒所爲救使係 兩宮德意
各國方有排解之法速辦方能補救緩則無及迫切上
陳臣李鴻章劉坤一奎俊張之洞綽哈布善聯王之春
袁世凱端方效辰

會銜電奏

光緒二十六年六月二十日辰刻發
由濟南繕發

奉寄諭各省認還洋款著卽暫行停解等因欽此目下
中外兵端已開臣等惟有欽遵力籌戰守恭繹廷旨之
意本因防亟餉絀故俯爲各省籌畫移還款以充餉需
惟此事於全局軍餉甚有關係現在東南各省尙無兵

事商貨亦尙流通故稅釐得以徵解軍餉得資挹注而風鶴震驚居民遷徙收數已不免短絀各項洋款均以關稅釐金作抵彼貪我通商之利與應還之款牽制顧忌不敢到處逞志今若停還彼無所希冀各國股票驚惶必致聳動該國力據海關分擾沿江沿海沿邊等省臣等均有守土之責自應極力抗拒惟利鈍非所逆覩難免日久曠持從此軍事四起腹地伏莽乘機滋擾外侮內患天下騷然洋貨不能入土貨不能出各省商販裹足不前洋關與沿海常關固涓滴無收內地稅釐亦必因而大絀京外正在籌備戰守餉需不繼爲害非輕

臣等查每年應還各洋款計共二千數百萬兩每年洋稅及洋藥稅計收二千數百萬兩常稅釐金計收二千萬兩左右稅釐兩項歲各收銀四千餘萬兩除還洋款外尙可餘銀二千萬兩之譜若沿江沿海沿邊等省到處用兵洋稅全失內地稅釐收數亦必十去五六通盤核計較之向解洋款轉受虧在千萬兩以外是停還洋款於各省籌餉有損尤於京餉有妨蓋停戰無期則需餉尤鉅既有必戰之志必寬留籌餉之源臣等再四思維擬懇天恩俯念此時保疆以練兵爲急務籌餉以商賈釐稅爲大宗洋款若停牽動內地釐金亦礙華民生計轉

於餉需有害京餉及北上諸軍餉項無從接濟關繫尤大可不飭下戶部通盤籌計俯准暫行仍照舊案解還以保餉源而維全局俟數月後體察大局情形再行請旨辦理臣等未敢擅便謹據實核計聲明請旨遵行臣李鴻章善聯劉坤一張之洞奎俊丁振鐸袁世凱王之春松壽劉樹堂德壽聶緝規號辰

會銜電奏

光緒二十六年六月二十五日申刻發
由濟南繕發

竊此次戰事由於匪徒藉口仇教肆行燒殺致釀大患各國亦以勦匪救使及保護商民教士爲詞調艦增兵合而謀我軍事既起各省自應力籌戰守臣等已將防

務嚴密籌備儻彼族前來侵犯卽當奮力抵抗不敢稍涉疏虞竊維中朝寬大聖澤如天懷柔遠人無不仁至義盡目前辦法總須將朝廷萬不得已之苦衷及並行不悖之德意切實宣諭庶匪徒不敢藉端滋擾爲害地方臣等於戰事初起之時卽行出示曉諭務各相安不必妄生疑慮并接出洋華民稟電請保護各國洋人以免報復情詞極爲迫切臣等遂乘各領事來商保護商教之時會飭江海關道余聯沅與之訂定章程長江一帶及蘇杭內地各國如不侵犯我當照常保護經各領事電商各外部臣等亦電各使臣向各國切實聲明德

因戕使頗持異議嗣因各國牽制遂亦帖然就範恭繹五月二十九日諭旨現在各使館勢甚危迫我仍盡力保護并飭臣等各盡職守所當爲相機審勢竭力辦理六月初三日寄諭各使臣現仍嚴飭帶兵官照前保護使館惟力是視各該大臣在各國遇有交涉事件仍照常辦理等論是朝廷於天津犯順之洋人則痛予懲創於未與戰事之洋官商教則曲爲保全威德兼施昭如日月臣等屢次奏請保護公使亦以聖慮之所重時局之所繫首在此舉不容稍緩迭准各出使大臣楊儒等來電總以保全公使暨在各省之洋人爲第一要義擬

懇天恩飭下在京得力各軍保護各國公使正所以自
保使臣飭令各督撫保護在華洋人正所以自保在洋
華民不勝急迫之至臣劉坤一張之洞奎俊王之春劉
樹堂聶緝規有申

張文襄公全集卷八十終

紹興孫家棟校